

Uunga siunnersuut: Aningaasarsianit akileraarutit pillugit Inatsisartut inatsisaata allangortinneqarneranik Inatsisartut inatsisaat nr. xx, xx. xxx 2017-imeersoq (Soraarnerussutisiaqalernissamut aningaasaatit Kalaallit Nunaanni angerlarsimaffeqartut akileraaruserneqartarnerat, soraarnerussutisiassanit naafferartumik annertoqatigiimmik tunniunneqartartussanit soraarnerussutisiassanik nuussineq, akileraarutitigut sumut attuumassuteqarnermut tunngasut aamma avataaneersunut sulisussanut, Namminersorlutik Oqartussat sinnerlugit mittarfiliassanik suliaqartunut, ilanngaasiinnginnermi akileraarutitut aaqqissuussineq)

(Aningaasaqarnermut Akileraartarnermullu Naalakkersuisumit saqqummiunneqartoq)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerpeqarneranut

ISUMALIUTISSIISUTAA

Ataatsimiititaliap suliarinninnermini ilaasortarai:

Inatsisartunut ilaasortaq Jens Immanuelson, Siumut, siulittaasoq
 Inatsisartunut ilaasortaq Randi V. Evaldsen, Demokraatit, siulittaasup tullia
 Inatsisartunut ilaasortaq Peter Olsen, Inuit Ataqatigiit
 Inatsisartunut ilaasortaq Bendt Kristiansen, Inuit Ataqatigiit
 Inatsisartunut ilaasortaq Martha Lund Olsen, Siumut
 Inatsisartunut ilaasortaq Ineqi Kielsen, Siumut
 Inatsisartunut ilaasortaq Kelly Berthelsen, Inuit Ataqatigiit

Ulloq 14. november 2017-imi siullermeerinninnerup kingorna ataatsimiititaliap siunnersuut misissorpaa.

1. Siunnersuutip imarisaa siunertaalu

Inatsisissatut siunnersuut pingaartumik pissutsinut marlunnut tunngassuteqarpoq. Ilaatigut soraarnerussutisianik akileraarusiisarnermut maleruagassanik, Danmarkimi PFA Pensionimut soraarnerussutisiassat nuunnissaannik PFA Soraanerup pilersaaruteqarnera tunngavigalugu Finanstilsynimit piumasaqaatigineqartunik naammassinnittussanik, iluarsiinissat inatsisissatut siunnersuummi siunnerfigineqarput.

Ilaatigullu sulisunit avataaneersunit, Namminersorlutik Oqartussat mittarfiliassaannut atatillugu suliaqartunit, akileraarutit A-t pissarsiassat nunap karsianut tutsinneqartarnissaat inatsi-

sissatut siunnersuummi siunnerfigineqarpoq. Taamaalilluni akileraarutinit pissarsiat siunertanut allanut, soorlu mittarfinnik sanaartornermut, atorneqarsinnaalissapput. Tassunga atatilugu siunnersuutigineqarpoq ilanngaasiinnginnermi akileraarusiisarneq atuuttoq inunnut Namminersorlutik Oqartussat mittarfiliorteranni sulisorineqartunut aamma atuutsinneqalissasoq.

Taamaalilluni Inatsisartut aamma Naalakkersuisut mittarfinnik nutaanik sanaartornissaq pillugu aalajangiinerisa piviusunnngortinneqarnissaanik suliaqarnermi inatsisissatut siunnersuut ataatsimoortoq pingaaruteqartutut inissisimasoq Naalakkersuisut paasisutissiisutigaat.

2. Siunnersuutip Inatsisartunit siullermeerneqarnera

Siunnersuut siullermeerneqarami tapersorsorneqarluarpoq. Apeqqutit nalornissutaasut paasinarsinneqarnissaat siunertaralugu siunnersuut ataatsimiititaliamit suliarineqartussanngorlugu innersuunneqarpoq.

3. Tusarniaanermut akissutit

Oqartussaasunik kattuffinnillu tusarniaaneq pillugu immikkoortumi Naalakkersuisut allapput: *“Inatsisissatut siunnersuummi nr. 1, SISA naaperiarniarlugu suliarineqarpoq aammalu SISA-p soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisissaattut siunnersuummut tusarniaanermut akissuteqaataa tunngavigalugu suliarineqarluni. Inatsisissatut siunnersuummi nr. 2 PFA Soraarneq naaperiarniarlugu suliarineqarpoq. Siunnersuummi nr. 1 aamma 2 tamatuma saniatigut SISA-mi aamma PFA Soraarneq-mi 2017-imi ulloq 29. septembarimiit ulloq 3. Oktobarimut tusarniaassutigineqarpoq.*

Inatsisissatut siunnersuummi nr. 3 aamma 4 aningaasarsianit akileraarutit pillugit Inatsisartut inatsisaata allannngortinneqarnera pillugu inatsisissatut siunnersuummut (UKA2017/98), UKA2017-imi Inatsisartuni suliarineqartumut, allannnguutissatut siunnersuutip ilaatut suliarineqarput. Aningaasaqarnermut Akileraartarnermullu Naalakkersuisoqarfium allannnguutissatut siunnersuut taanna ulloq 11. oktober 2017 atorfilittanut suleqatigiinnut ilaatigut Ilulissani, Nuummi aamma Qaqortumi mittarfinnik sanaartornissamut piareersaasussatut Naalakkersuisunit pilersinneqartunut, tusarniaassutigalugu nassiuppaa. Atorfilittani suleqatigiinni taakkunani ilaapput Naalakkersuisut Siulittaasuata Naalakkersuisoqarfiani Ingerlatseqatigiiffinnut Allattoqarfimmi immikkoortortaqaqarfimmi pisortaq aamma Kommunitut, Nunaqarfinnut, Isorliunerusunut, Attaveqaqatigiinnermut, Ineqarnermullu Naalakkersuisoqarfimmi, Inuussutissarsiornermut, Suliffeqarnermut, Niuernermit Nukissiuuteqarnermullu Naalakkersuisoqarfimmi aamma Aningaasaqarnermut Akileraartarnermullu Naalakkersuisoqarfimmi naalakkersuisoqarfimmi pisortaanerit. Inatsisissatut siunnersuummut killissaliussat atorfilittani suleqatigiinni taaneqartuni tamanna sioqqullugu oqallisigineqarput. Tusarniaanermut akissuteqaateqarnissamut piffissamut killiliussamik aalajangersaasoqanngilaq, tassami akissuteqarnissaq piaartumik pissasoq qinnutigineqarmat. Ulloq 12. oktober 2017 tusarniaaffigineqartut tamarmik oqaatigaat inatsisissatut siunnersuummut oqaaseqaatissaqaratik.

Suliniutaasussat inatsisissatut siunnersuummi nr. 3-4-imi pineqartunut ilaasut 2018-imi aningaasanut inatsisissatut siunnersuummi, aningaasanut inatsisissatut siunnersuummut nassuiaatini nalinginnaasuni immikkoortoq 4.3-imi aamma eqqartorneqarput.”

Siunnersuutip ilaata soraarnerussutisiassanut tunngasup sivikitsuararsuarmik tusarniaassutigineqarnera eqqaassanngikkaanni siunnersuut nalinginnaasumik tusarniaassutigineqarsimanngitsoq ataatsimiititaliap paasivaa. Tamanna ataatsimiititaliamit assut isornartoqartinneqarpoq. Siunnersuutip matumani pineqartup soq nalinginnaasumik tusarniaassutigineqarsinnaasimanninneranut tunngavilersuutit ataatsimiititaliamit amigaatigineqarput.

Tusarniarneqartut inatsisissatut siunnersuummik misissuinissaminnut, tassungalu ilanngullugu oqaaseqaatinik suliaqarnissaminnut, naammaginartumik piffissaqartinneqarnissaannik qulakkeerinnittumik inatsisissatut siunnersuutit avammut tusarniaassutigineqareermik kingorna aatsaat siullermeerneqarsinnaasut tunngaviusumik isigalugu ataatsimiititaliaq isumaqarpoq.

Inatsisissamik piareersaalluni sulinermut atatillugu tusarniaanermik Naalakkersuisut isumaginninnerat Inatsisartut ataatsimiinneranni matumani ataatsimiititaliamit aatsaat isornartorsiorneqalinngilaq. Atorfilittat suleqatigiit pisortasut tusarniaavigalugit inatsisissamik piareersaanerup ingerlanneqarsimanera ataatsimiititaliamit eqqarsarnartoqartinneqarpoq.

Inatsisissatut aalajangiiffigisassatullu siunnersuutit Inatsisartunit akuerisassanngorlugit saqqummiunneqartut, ilaatigut innuttaasut inatsisitigut illersugaanerisa salliutinneqarneratigut qaffasissumik pitsaassuseqarnissaat pinerit tamaasa qulakkeerniartaqqullugu Naalakkersuisut ataatsimiititaliamit kaammattorneqarput. Tassunga atatillugu ataatsimiititaliaq isumaqarpoq avataaneersunik naammaginartumik piffissaqartitsilluni tusarniaanerit assut pingaaruteqartut. Taamaalillunilu tusarniaanermut akissuteqaasiornissaq tusarniarneqartumut isumaqassappat, siunnersuutip kingunerisassaanik naliliinissamut piffissaqartinneqarluni suliarilluugaasumik sukumiisumillu tusarniaanermut akissuteqaasiornissamut tusarniarneqartup periarfissinneqarnissaa pisariaqarpoq. Taamaattoqanngippat Inatsisartut aalajangiinissamut tamakkiisumik tunngavissaqartinneqanngeratarsinnaapput. Pissutsit pingaarutillit immikkullu ittut aammalu siumut naatsorsuutigineqarsinnaasimannngitsut, taamaattumillu naammaginartumik tusarniaasoqarnissaanik periarfissaqarfiumngitsut, pisimanngippata taamatut pisoqartariaqanngilaq.

4. Ataatsimiititaliap siunnersuummik suliarinninnera

Tusarniaanermik uparuaanerminut atatillugu ataatsimiititaliamit ajuusaarutigineqassaaq ataatsimiititaliap Inatsisartullu siunnersuummik suliarinninnissaminnut killilimmik piffissaqartinneqarnerat.

Siunnersuut 2018-imi aningaasanut inatsisissatut siunnersuummi nalinginnaasumik nassuiaatit ataanni immikkoortoq 4.3-mi taaneqartoq siunnersuutip matuma siullermeerneqarnerani Naalakkersuisut paasissutissiisutigaat. Taamaattumillu Naalakkersuisut isumaat malillugu siunnersuut tusarniarneqarsinnaasunit ilimagineqareersimasariaqaraluartoq. Kommuninut tunngatillugu Naalakkersuisut isumaqarput tamanna kommunit missingersuutiminni ilanngullugu sillimaffigisimappasuk pissusissamisuussasoq. Siunnersuutip imarisai pingarnerit marluk aningaasanut inatsisissatut siunnersuummut nassuiaatini kalaallisuuani qupp. 145/146-mi

ilaatinneqartut ataatsimiititaliamit maluginiarneqarpoq. Tassanili allassimangilaq tamanna pillugu siunnersuummik tigussaasumik UKA 2018-imi Naalakkersuisut saqqummiussilersaartut. Ataatsimiititaliamit aalajangiusimaneqarpoq tusarniaaneq ingerlanneqarsimasariaqaraluar-toq aammalu minnerunngitsumik kommunit tamatumani qitiusumik inissisimasariaqaraluar-tut. Aningaasanummi inatsimmi Naalakkersuisut siullermeerinninnermi innersuusutigisaanni allassimavoq taamatut aaqqiisoqassappat tamanna pillugu kommunit isumaqatigiissuteqar-figinissaat imaluunniit inatsit aqputigalugu suliniuteqarnissaq pisariaqartoq.

Kiisalu aningaasanut inatsisissatut siunnersuummut nassuiaatini qupp. 170-imi Naalakker-suisut oqaatigaat aningaasanut inatsisissatut siunnersuummi sanaartornermut tunngasut tunngaviit sisamat aallaavigalugit aaqqissuunneqarsimasut, taakkuli iliuusissanut tigussaa-sunut tunngatillugu erseqqissarneqarsimangillat. Takussutissiami (qupp. 170) AIS 2018-imi sanaartugassanut aningaasaliissutit suliaasaqarfinnut agguataakkat Naalakkersuisunit allattor-neqarsimapput. Tassani allassimavoq piffissami aningaasaanut inatsiseqarfiusumi 2018 – 2021-imi 15 mio. kr.-it ukiumut timmisartoqarfinnut immikkoortinneqartut.

Tamanna tunngavigalugu ataatsimiititaliaq naliliivoq siunnersuummik siusinnerujussuakkut saqqummiussinissaminnut Naalakkersuisut periarfissaqarsimasut. Matumani Inatsisartut Sule-riaasiat innersuusutigineqassaaq. Kiisalu ataatsimiititaliaq naliliivoq siunnersuutip matuma piareersarneqarnerani kommunit akuutinneqarsimasariaqaraluartut.

Soraarnerussutisiaqalernissamut aningaasaatit Kalaallit Nunaanni angerlarsimaffeqartut aki-leraaruserneqartarnerat aamma soraarnerussutisiassanit naafferartumik annertoqatigiimmik tunniunneqartartussanit soraarnerussutisiassanik nuussineq.

Naalakkersuisut paasissutissiissutigaat PFA Soraarnej paasissutissiisoq, aaqqissuussinerit 1:1-istik tunniunneqarnissaat, PFA Soraarnermi soraarnerussutisianut annertoqqatigiinnik tunniunneqartartussanut aaqqissuussinernit soraarnerussutisiassat ataasiakkaanit sillimmasiis-sutigineqartut PFA Pensionimut nuunneqarnissaannik Finanstilsynip akuersinissaanut piuma-saqaataasoq. Taamaattumik Inatsisartut inatsisaata allanngortinneqarnissaa PFA Pensionimit piumasarineqarpoq, taamaalillutik soraarnerussutisianut annertoqqatigiinnik tunniunneqartar-tussanut aaqqissuussinernit nuunneqartunit tunniunneqartussat, ataasiakkaanit sillimmasiis-sutaappata imaluunniit sulisitsisumit sillimmasiissutaappata apeqquataatinnagu, PFA Pen-sionimut nuussereernerup kingorna aaqqissuussinernut sulii akiliuteqartoqartartussaagaluartoq, akileraaruteqaataasussaajunnaarsinneqassallutik. PFA Pension paasissutissiivoq katillugit aaqqissuussinerit 394-it ataatsimut katillugu 110 mio. koruunit missaannik toqqorsivim-miititaqartut tassani pineqartut.

Allannguut aqputigalugu naatsorsuutigineqarpoq PFA Soraarnej Finanstilsynip akuersissute-qarnissaanik piniarsinnaalissasoq.

Siunnersuummut nassuiaatit malillugit aalajangersakkami (§ 1-ip ataani nr. 1) isertitanit inger-latseqatigiiffimmit akileraaruteqaataasussani akileraarutip PAL-ip ilanngaatigineqarnissaanut inatsimmi tunngavissiisoqarpoq.

Aalajangersakkap (§ 1-ip ataani nr. 2) malitsigisaanik soraarnerussutisianik annertoqqatigiim-mik tunniunneqartartussanik tunniussinerit, soraarnerussutisianut ingerlatseqatigiiffimmit il.il.

Kalaallit Nunaanni angerlarsimaffeqartumit, soraarnerussutisianut ingerlatseqatigiiffimmut il.il. Kalaallit Nunaanni angerlarsimaffeqanngitsumut, soraarnerussutisiassanik nuussinermut ilaatillugu § 46, imm. 5-imi aalajangersagaq malillugu akitsuuserneqartussat, isertitani akileraaruteqaataasussani naatsorsuinermi ilaatinneqassanngillat.

Inummut ilanngaatitaqanngitsumik il.il. nunatta karsianut 35 %-imik ilanngaasiinnginnermi akileraaruteqarnissamik aalajangersakkat

Naalakkersuisut siunnersuutigaat sulisussat avataaneersut, Namminersorlutik Oqartussat sulillugit mittarfiliassanik sanaartornermik suliaqartussat, ilanngaasiinnginnermi akileraaruteqartinneqarnerannit pissarsiassat nunap karsianut tutsinneqassasut. Maleruagassat atuuttut malillugit inuit akileraaruteqartinneqarnerannit pissarsiassat nunap karsianut aamma kommuninut agguarneqartarput.

Sulisartunit qaammatit 6-it kingulliit iluanni Kalaallit Nunaanni kommunimut akileraartussaataasimasunit akileraarutinit pissarsiassat siunnersuummi matumani pineqartunut ilaatinneqanngillat, maannamulli pisartutut kommunit aamma nunap karsiata akornanni agguarneqartassallutik. Mittarfiliassat kommuni sinnerlugu suliarineqartut siunnersuummi pineqartunut aammattaq ilaanngillat.

Kiisalu siunnersuutigineqarpoq sulisartut nunanit allaneersut mittarfiliassanut Namminersorlutik Oqartussat sinnerlugit sanaartorneqartussanut atatillugu suliaqarnermi sulisussat pineqartunut ilaatilerlugit, ilanngaasiinnginnermi akileraarusiisarnermik aaqqissuussineq anertusitinneqassasoq. Aaqqissuussinerup malitsigisaanik isertitat (ilanngaasiinnginnermi isertitat) 35 procentiannik inaarutaasumik akileraarummik akiliisoqartassaaq kiisalu sulisut ataasiakkaat nammineq nalunaarsuinermik tunniussisassanngillat aammalu akileraartartutut nalinginnaasutut taamatut ilanngaatiginninnissamut periarfissaqartinneqassanatik.

5. Siunnersuutip aningaasaqarnikkut kingunerisassai

Siunnersuutip aningaasaqarnikkut allaffissornikkullu kingunerisassai pillugit siunnersuuteqartup naatsorsuutigisaanut Aningaasaqarnermut Akileraartarnermullu Ataatsimiititaliaq oqaaseqaatissaqanngilaq.

6. Ataatsimiititaliap inassuteqaatai

Ataatsimiititaliami amerlanerussuteqartut Siumup Inuit Ataqatigiillu ilaasortaataat siunnersuut pillugu ima oqaaseqaateqarumapput:

Ataatsimiititaliap siunnersuummik siuliani suliarinninnerani oqaaseqaatigineqartut innersuusutigineqassapput.

Tamanna tunngavigalugu siunnersuut Inatsisartunit akuerineqassasoq **ataatsimiititaliami amerlanerussuteqartut siuliani taaneqartut inassutigaat.**

Ataatsimiititaliami ikinnerussuteqartoq siunnersuut pillugu ima oqaaseqaateqarumavoq:
“Naalakkersuisut siunnersuut una pipallatatut Inatsisartunut suliaritinniarsarimmassuk Demokraatinik naammagineqanngilaq. Naalakkersuisut ataqqinninngitsumik pissusilersorput –

Inatsisartunuinnaanngitsoq aammali tamat oqartussaaqataaneranni tunngaviusumik ingerlatseriaatsinut.

Siullermik inuiaqatigiit siunnersuummut oqaaseqaatissaminnik saqqummiussinissaminnut periarfissinneqaqqullugit inatsisissatut siunnersuutit pinerit tamaasa tusarniaassutigineqartariaqarput. Tusarniaanerlu taanna pissusissamisoorumik ima sivissusilerneqartariaqarpoq kattuffiit kommunillu siunnersuummik paasinninniarnissamut aammalu suliarilluagaasumik tusarniaanermut akissuteqarnissamut perarfissinneqarlutik. Pisumi matumani kommunit tusarniaanermut akissuteqarnissamut akunnernik arfineq marlunnik periarfissinneqarnissaat Naalakkersuisut toqqarpaat. Sapaatit akunneri arfineq marluunngitsut. Ullut arfineq marluunngitsut. Akunnerilli ARFINEQ MARLUK. Tamanna piviusorsiunngilluinnarneruvoq aammalu tamat oqartussaaqataaneranni tunngavinmut ingerlatseriaatsinullu tunngatillugu kanngunartuliornerulluni.


Aappattullu siunnersuutip uatsinnut Inatsisartunut piffissami kingullerpaami saqqummiunnissaa Naalakkersuisut toqqarpaat. Siunnersuut 8. november ullulerneqarsimavoq. Taamatut iliorneq Inatsisartunut ataqqinninngitsuliorneruvoq. Pipallatamik inatsisiliornissaq assut qanippoq, tamannalu Inatsisartunit akuerineqanngilluinnartariaqarpoq. Minnerpaamik aappassaaneerneqarnissaa pingajussaaneerneqarnissaalu upernaakkut ataatsimiinnissamut kinguartinneqartariaqarput.

Pingajuattut ilanngaasiinnginnermi akileraaruteqarnissaq pillugu siunnersuut qanoq sunniuteqassanersoq nalunarpaq. Aatsitassarsiornermik suliniutini aaqqissuussineq taamaattuusoq Naalakkersuisut tunngavilersuutiginiarsaraat, assigiinngissutaalli annertuvoq. Aatsitassarsiornermik suliniutit illoqarfiit avataanniittussatut pilersaarusiorneqarput, taakkunanilu sulisut atortulersuutinik sullississutinillu kommuninit neqeroorutigineqartunik atuisussaanatik. Taamaattumillu taakkunani ilanngaasiinnginnermi akileraarusiinissaq isumaqarluarpoq. Mittarfiliornermili sanaartortut pissutsit taamaaginnartillugit illoqarfinni mittarfiliorfusuni najugaqartussaapput. Aqqusernit atortartussaavaat, meeraat atuartussaapput il.il. Tassa kommunit atortulersuutaat sullississutaallu atortussaavaat. Taavami taakkununnga sooq kommunit akileraarutininik akiliiffigineqassanngillat? Nalinginnaasumik ingerlatsisoqarsimagaluarpat tamanna apeqqutillu allat akineqarnissaannut Naalakkersuisut siunersiuinissamut aggersarnissaannut piffissaqarsimassagaluarput. Maannakkutulli nukingiussamik pipallatamillu ingerlatsisoqarnerani tamanna piffissaqarfiginngilarput.

Tamat oqartussaaqataaneranni tunngaviit pitsaasut Naalakkersuisunit sanioqqunneqarnerat Demokraatinit sukkulluunniit akuersaarniannngilluinnarparput, tamannalu tunngavigalugu siunnersuut itigartinneqassasoq inassutigaa.


Tamanna tunngavigalugu siunnersuut Inatsisartunit itigartinneqassasoq **ataatsimiititaliami ikinnerussuteqartup siuliani taaneqartup inassutigaa.**

Taama oqaaseqarluni isumaliutissiisummilu allassimasutut oqaaseqateqarluni ataatsi-
miititaliap siunnersuut aappasaaniigassanngortippaa.




Jens Immanuel, siulittaasoq


Randi V. Evaldsen



Bendt B. Kristiansen



Peter Olsen



Martha Lund Olsen



Ineqi Kielsen



Kelly Berthelsen



**Finans- og Skatteudvalget
/Her**

**Ilanngussaq
Bilag**

**UKA 2017/38 – Aningaasarsianit akileraarutit pillugit inatsisartut inatsisaata
allanngortinneqarnera pillugu Inatsisartut inatsisissaattut siunnersuut**

Brevdato: 13-11-2017
Sags nr. 2017 - 23260
Akt id. 6614574

Inatsisissatut siunnersuutip sivikitsumik tusarniaassutigineqarnera Naalakkersuisut
suliaraat.

Ilanngullugu tusarniaanermi akissut pillugu allakkiaq allakkallu tusarniaanermut
akissutit ataatsimiititaliamut ilisimatitsissutitut nassiunneqarput

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl


Inussiarnersumik inuulluaqqusillunga

**EM 2017/38 - Forslag til: Inatsisartutlov om ændring af landstingslov om
indkomstskat**

Naalakkersuisut har foranlediget lovforslaget sendt i en kort høring.

Vedlagt fremsendes et høringsvarsnotat samt kopi af høringssvar til udvalgets
orientering.

Med venlig hilsen


Aqqaq B. Egede



Allakkiaq Notat

Uunga
Til

Aningaasaqarnermut- Akileraartarnermullu
Ataatsimiititaliaq

Allakkiaq ullua: 13-11-2017
Suliap normua 2017 - 23260
Suliap suussusaa. 6614710

Assinga uunga
Kopi til

P. O. Box 1037
3900 Nuuk
Tel. (+299) 34 50 00
Fax (+299) 34 63 50
E-mail: oed@nanoq.gl
www.naalakkersuisut.gl

EM 2017/38 Tusarniaanermut akissutinik allakkiaq

Ataasinngorneq ulloq novembarip 13-ianni nal. 9-miit nal. 16 tungaannut Inatsisissatut Siunnersuut tuaviortumik tusarniaanertut nassiunneqarpoq. Tamatuma saniatigut paasisutissinneqarput Siunnersuutip tamanut saqqummiunneqarnerani matuminnga assilisamik nassiussisoqarneratigut kommunit ilisimatinneqarput.

Tusarniaanermut piffissarititap naalernerani KANUKOKA-miit, Kommune Kujallermit aammalu Kommuneqarfik Sermersuumiit tusarniaanermut akissutinik tikiuttoqarsimavoq.

Kakkiussatut ilanngussimasut innersuunneqartut, tusarniaanermut akissutit, tulliuttuni, annertuumik naalisakkatut aqqusaartorneqassapput.

Aningaasaqarnermut Akileraartarnermullu Naalakkersuisoqarfiup oqaaseqaatai *uingasumik* allataapput.

KANUKOKA

Tusarniaanermut akissuteqarnissamut periarfissamut KANUKOKA-miit qujassuteqartoqarpoq.

Kommunimi missingersuusiata inissingajalernerisa kingorna, Siunnersuut taama kingusitsigisukkut saqqummiunneqarmat KANUKOKA-miit naammagittaalliutigineqarpoq.

KANUKOKA-miit kissaataajuarpooq Mittarfinnut pilersaarutinut sapinngisamik sumiiffimmeersunik sulisoqarnissap atorneqartariaqarnera, tamakkiisumillu akileraaruteqartitsinermit ilusilersugaq, sumiiffimmi sulisunik atuinermut pitsanngorsaanissamut periarfissamut pilersaarutinut ajortunik sunniuteqartariaqanngitsooq.

Mittarfinni pilersaarutinik sanaartornermi, sapinngisamik kalaallinik sulisoqarnissaq anguniagaavoq.

Tamakkiisumik akileraaruteqartitsinermik aaqqissuussinermik atulersitsineq tamatuminnga anguniakkamik ajortumik sunniuteqanngilaq.

Sulisitsisunut akileraartarnermullu aqutsisoqarfimmut iluaqutissatut avataaninngaaneersumut sulisumut akileraartarnermut piuminartumik nalunaarusiomissamut tamakkiisumik akileraaruteqartitsinermik aaqqissuussineq siunertarineqarpoq.


Tamatuma akerlianik akileraartartumut ataasiakkaamut annikinnerusumik akileraartitsisalernissamik, tamakkiisumik akileraaruteqartitsinermik aaqqissuussinermi siunertarineqanngilaq.

Isertitat akileraarutaasussat nalunaarsornerini, tamakkiisumik akileraaruteqartitsinermik aaqqissuussinermi, nalinginnaasumik ilanngaammut inummullu ilanngaammut aammalu allanut assigiisitsinissamut ilanngaatinut, akileraartusseq periarfissaqanngilaq. Taamaattumik suliarineqarnerani, tamakkiisumik akileraaruteqartitsinermut aaqqissuussinermut ilaatinneqarnerminngaaniit, nalinginnaasumik akileraartarnissaq, akissarsiakinnernut iluaqutaassaaq.

58.000 kr.-inik inuttut- nalinginnaasumillu ilanngaatitalimmik, nalinginnaasumik 44 pct.-inik akileraartussamut sanilliullugu, inummut- aamma nalinginnaasumik ilanngaatitalimmik ukiumut 290.000 kr.-it ataallugit akissarsialinnut, sulisoq 35 pct.-inik tamakkiisumik akileraartussatut inissinneqarsimasoq, qaffasinnerusumik akileraartussatut inissisimassaaq.

58.000 kr.-inik inuttut- nalinginnaasumillu ilanngaatitalimmik, nalinginnaasumik 42 pct.-inik akileraartussamut sanilliullugu, inummut- aamma nalinginnaasumik ilanngaatitalimmik ukiumut 350.000 kr.-it ataallugit akissarsialinnut, sulisoq 35 pct.-inik tamakkiisumik akileraartussatut inissinneqarsimasoq, qaffasinnerusumik akileraartussatut inissisimassaaq.

akileraarnissamut ilusilersukkami sumiiffik apeqqutaatillugu tamakkiisumik akileraaruteqarnissamut aaqqissuussineq 290.000-niit 350.000 kr. sinnerlugit isertitaqartuulluni akileraartussamut oqinnerusumik akileraartitaanermik nassataqassasoq takuneqarsinnaavoq. Akileraarutissap katillugit procent-iannut apeqqutaassaaq titarnerit imminut naapiffiat. Tamanna ataani ilusilersukkami titartarnerini takuneqarsinnaavoq.



Assersuutigalugu akileraartussaq ernianut aningaasartuuteqaruni imaluunniit akilersuuteqaruni, aammattaaq tamanna nalinginnaasumik akileraartussamut pilerinartuussaaq, (tamakkiisumik akileraaruteqartitsinermut aaqqissuussinermut ilaatinneqarnermiit) tassami ernianut aningaasartuutit akilersuutillu akileraarutissatut isertitanik nalunaarsuinerimi ilanngaatigineqarsinnaammata.

Tamaasa kattukkaanni, aaqqiineq akissarsiakitsitsivallaarnermut atorneqassasoq naatsorsuutigissallugu tunngavissaqanngilaq.

Kommuneqarfik Sermersooq (KS)

Piffissami inuuffigisatsinni sanaartugassatut pilersaarutini pingaarnepaatut kommunimiit isigineqartumi, mittarfiliornert aningaasalersornissaannut allatukkajaaq eqqarsarnissamut pisariaqartitsisoqartoq KS-imiit akuersaarneqarpoq.

Pissusissamisoorpoq, Siunnersuut avataaniit suliartortunut taamaallaat sunniuteqassasoq. Tamanna pillugu Siunnersuummi aalajangersakkat takukkit. Taamaattoq Siunnersuummi allamiluunniit sumiiffimmeersut sulisut allameersullu sulisut agguataarnerinut takussutissaqanngilaq, taamaattumik Siunnersuutip aningaasatigut kingunerisassaanik Namminersorlutik Oqartussanut kommunimullu naatsorsuinissamut periarfissaqanngilaq.

KS-miit isumaqarfigineqarpoq, akileraartarnermut akileraarnermullu agguataarisarnermut nalinginnaasumut saneqqutsinissamut pisinnaatitsisunik pissutsinik atuuttoqangitsoq. Siunnersuut, pineqartunut assigiinngitsunut Namminersorlutik Oqartussat pilersaarutaannut – akileraartarnerpiaq eqqarsaatigalugu - »immikkut ittumik« sulissunneqartarnissaannut patsisissatut periarfissanik ammaavoq.

Ajornartorsiutitut annerpaanut ilaasoq tassaavoq sumiiffinneersunik sulilersitsinissamik Siunnersuut iluaqusiinngimmat, taakkumi nalinginnaasumik akileraartussaapput, taamaattumillu nalinginnaasumik isumaqatigiissutinik akissarsiaqartinneqartussaallutik. Taamaattumik, naammassinissamut qaninnerpaaffiini akit nalinginut sunniisartutut,

Nuummi mittarfimmik sanaartorneq naleqassutsiminik annaasaqassaaq. Taamaattumik, avataaniit suliaartortunut naleqqiullugu sumiiffimmi sulisunut ajunngitsorsiassaqartitsinerunissamut aaqqiineq Kommuneqarfik Sermersuumiit qaquguluunniit piumaneqarneruvoq. Iluanaarummiit, sulisut tamarmik pissutsinik assigiinnik atugassaqartinneqarnissaat Kommuneqarfik Sermersuumiit pingaernerutinneqarpoq.

Eqqaaneqartariaqarpoq, tamakkiisumik akileraaruteqartitsinermut aaqqissuussinermi, qulaaniit isigalugu, avataaniit suliaartortunik akileraartitsinermik allaffissornikkut ajornanngitsumik nalunaarsuinermut, Akileraartarnermut Aqutsisoqarfimmuut sulisitsisunullu iluaqutaanissaa qulakkiissallugu siunertarineqarmat.

Aammattaaq KANUKOKA-miit tusarniaanermut akissummut innersuussisoqarpoq.

KS-miit isumaqarfigineqarpoq, Siunnersuut TONU-imik najoqqutassiamut (Tamakkiisumik Oqimaaqatigiissaarinermik Najoqqutassiaq Uigusamut) akerliusoq.

Namminersorlutik Oqartussat kommunillu akornanni isumaqatigiisummi isumaqatigiisutaavoq, taanna oqaatigineqartoq TONU-mik najoqqutassiaq (Tamakkiisumik Oqimaaqatigiissaarinermik Najoqqutassiaq Uigusaq) tassaassasoq maleruagassiuinermut atortussaq, Kommuninut kinguneqartussanik Namminersorlutik Oqartussat maleruagassanik allannguinernik suliaqarnerannut atatillugu atorneqartussaq. Ataatsimoortumik tapiissutit, kommuninut aningaasartuutaanerusutut kingunerinut naligiissarneqassapput. Tamanna illugiimmik atuutissaaq, taamaalilluni maleruagassamik allanngiineq Kommunip aningaasartuutaanik annikillitsippat, assinganik ataatsimoortumik tapiissutit annikillisinneqassallutik.

Kommunini sanaartornermik aningaasaliinerit assigiinngitsut naammassineqarnissaannut atatillugu TONU-mik najoqqutassiaq (Tamakkiisumik Oqimaaqatigiissaarinermik Najoqqutassiaq Uigusaq) (DUT princippet-imik qallunaatut taagorneqartoq) atorneqassanngilaq, tamakku sanaartornermut aningaasaliinerit Namminersorlutik Oqartussanit, kommunimit namminermit imaluunniit namminersortunit aningaasaliiffigineqarnerisut apeqqutaatinnagu.

Suliami tamatumani pineqartumi Namminersorlutik Oqartussat annertuumik sanaartornermut aningaasaliilersaarput. Tamakku qularutissaanngitsumik kommunip attuumassuteqarfigineqartup aningaasaqarneranut pitsaasumik sunniuteqassapput. Taamaattooq tamanna sunniut TONU-mik najoqqutassiap siunertaata avataanut tuttussaassaaq – taamaattumillu Namminersorlutik Oqartussat, kommunini pineqartuni aningaasarsiornikkut suliatigut annertusisoqarnissaanik patsiseqarlutik, assortorneqarsinnaanngitsumik kommunit aningaasaqarnerinik pitsannguisussat, kommunimut attuumassuteqarfigineqartumut ataatsimoortumik tapiissutinik appaaffiginninniaratik.

Tamatuma assinganik, kommunit aningaasaqarnermi inissisimaffiannut suli pitsanngorsaataanerusumik, avataannit suliaartortunik tamakkiisumik akileraaruteqartitsinermik atugassaqartinnerinut, nalinginnaasumillu akileraartinnginnerinut sanilliullugu, taarteqartitsivigineqarnissaat patsisissaqartinneqanngilaq.

Naalakkersuisut, avataaneersunik tamakkiisumik akileraaruteqartitsineq matumani pineqartumi, sumiiffimmeersunik sulisoqarnissamut sanilliullugu unammilleqatigiinnermik equtitsisutut patsisitut akuerinngilaat. Sulisartup avataaneersup pineqartumi suliat suliarisassai tassaapput sumiiffimmeersup suliarisinnaanngisai piginnaassutsit immikkut ittut imaluunniit naammattumik pisinnaasunik sulisussaqaqarnermik amigaateqarneq pissutaallutik.

Tamatuma saniatigut KANUKOKA-miit tusarniaanermut akissutitut oqaaseqaatinut innersuussisoqarpoq.

Mittarfinnut pilersaarutitut piginneqataanissaq, KS-imiit kissaatigineqarpoq.

Mittarfinnut pilersaarummut piginnittuuneq Inatsisissamut Siunnersuutip sinaakkutaasa avataaniippoq. Manna Inatsisissamut Siunnersuut akileraartarnermut tunngasunut attuumassuteqarpoq.

Kommune Kujalleq (KK)

KK-miit aallaqqaatitut eqqaaneqarpoq, tuaviuussamik kingusissumillu tusarniaaneq pissusissamisuunngitsoq.

KK-miilli sumiiffimmeersunik sapinngisamik amerlanerpaanik sulilersitsinissamik qulakkeerinnissaq sulissutigiumaneqarpoq, piumasaqaatigaluguli tamakkiisumik akileraaruteqartitsinermut ilusilersugaq pilersaarummut sumiiffimmeersunik sulisoqarnissamut pitsanngorsaannissamut periarfissanik ajortumik sunniuteqassanngitsoq.

Qulaani nassuiaatigineqareersutut sumiiffimmeersunik sulisunik sapinngisamik amerlanerpaanik atuinissamut-ajortumik sunniuteqassanngitsoq Siunnersuut nalilerneqarpoq.

KK-miit nalilerneqarpoq, matumani Inatsisissatut Siunnersuummi Qaqortumi nutaamik mittarfiliornissamik sanaartornissamik pitsaaqutit ajoqutininnaaniit amerlanerusut, taamaattumillu taamaakkaluartoq Siunnersuummik akuersisoqarnissaa taperserlugu.

Kommunit paasinninnerat Naalakkersuisut nuannaarutigaat



KANUKOKA

Kalaallit Nunaanni Kommunit Kattuffiat • De Grønlandske Kommuners Landsforening

Til: Departementet for Finanser og Skatter
OED@nanoq.gl

Ulloq/Dato: 13-11-2017
J.nr. 06.05.01.G01.1.16

Att: Per RP. Nielsen
PNIL@nanoq.gl

Tursarniaaneq una pillugu : Tuaviortumik-tusarniaaneq: EM 2017/38 Inatsisartut inatsisiliaat-nit isertitat aallaavigalugit akileeraartarnermut allannguuteqarnissamut siunnersuut (akileraarutit peernagit mittarfiliorterit , PFA il-il.)

KANUKOKA tusarniaanermut akissuteqarsinnaatitaanini qutsatigaa.
KANUKOKA.p iluarinngilaa, siunnersuutit kommunini missingersuutiliat tamangajammik naammassereersullu aatsaat nassiunneqarnera.

KANUKOKA-p kissaatigerpaavaa, mittarfiliortiternerni nunaqavissut tamakkiisumik sulisorinia-neqarnissaat, aammalu isertitat suli ilanngarnagit periutsip ajoqutaanngitsumik nunaqavissunik suliassanut sulisoqarnissaa.

**Inussiarnersumik
Med venlig hilsen**

**Simon Simonsen
Formand**

Til: Departementet for Finanser og Skatter

OED@nanog.gl

Att: Per RP. Nielsen

PNIL@nanog.gl

13.november 2017

j.nr. 00.07.02

Brevnr 17-1-492

Tursarniaaneq una pillugu : Tuaviortumik-tusarniaaneq: EM 2017/38 Inatsisartut inatsisiliaat-nit isertitat aallaavigalugit akileeraartarnermut allannguuteqarnissamut siunnersuut
(akileraarutit peernagit mittarfiliornit , PFA il-il.)

Kommune Kujalleq qujavoq tusarniaanermi akissuteqarnissamut periarfissinneqarami. Kommune Kujalleq aallaqqaasiutigalugu erseqqissaatigerusuppaa , taama kingusitsigisumi aammalu taama tassanngaannartigisumik tusarniaasoqarnera.

Kommune Kujalleq-up erseqqissaatigissavaa assut uggorimmagu , kommunit avataaniit suliaartortunit akissarsiat akileraarutaat iluanaarutigissannginnamiuk. Annerusumilli Kommune Kujalleq-up nalilermagu pingaartillugu , mittarfiliornissap piviusunngortinnissaa aammalu Qaqortup mittarfia minnerpaamik 1500 meteriunissaa aammalu 2020 atoqqaartissinnaanissaa.

Mittarfiliortoqareernerata kingorna , Mittarfiup iluaqutaanissaa, ineriartornikkut aningaasatigullu isertitsiffigisinnaanera Kommune Kujalleq-mit annerusumik pingaartinneqarpoq.

Kommune Kujalleq-li pisinnaasani tamaat nunaqavissut sulisinnaanissaat piviusunngortissallugu aammalu akileraarani suli isertitat ajortumik kinguneqannginnissaat suliamullu nunaqavissut sulisinnissaat sulissutigissallugu.

Kommune Kujalleq siunnersuummut oqaasertaleeqqinnissaminut pissutissaqanngilaq, 2018-mi Qaqortumi mittarfiliornissap aallartinnissaanut , Mittarfiullu 2020-mi atoqqaartinnissaanut qilanaalereerpugut.

Inussiarnersumik Inuulluaqqusillunga

Kiista P. Isaksen

Siunnersuut una pillugu: Inatsisartut inatsisiliaat nr.xx –mit xx. Xx 2017 inatsisip aningaasarsiat akileraarutaasa allannguutissaa pillugu

Kommuneqarfik Sermersooq ima ittumik siunnersuummik tigusaqarpoq: Inatsisartut inatsisiliaat nr.xx-mit xx-xx 2017 tusarniaaneq inatsisip aningaasarsiat akileraarutaasa allannguutissaa pillugu.

Allakkami matumani siunnersuummut ukua attuumassuteqarput § 1, siulleq 1, nr.3 aamma 4, [inatsisit aningaasarsiap akileraarutaannit § 68, aappaat 2, nr 7 aamma § 72 a , siulleq 1,1 . naggat]

Aallaqqaasiullugu Kommuneqarfik Sermersooq-p maluginiaqquaa, kommunip akuersaarsinnaammagu, mittarfeqarfissat aningaasalersornissaanut, allaanerusumik pilersaarusiornissaq pisariaqartutut isigineqarmat, tamannalu suliaq kommunip sanaartornermi maannamut pilersaarutaani pingaaruteqarnerpaatut inissisimammat

Nuuk-p mittarfissaanut sanaartornissami missingersuutaasuni 1.300 mio.kr-nit missaat atorneqarnissaat ilimagineqarpoq Nalinginnaasumik sanaartornermi aningaasartuutit 40 %-iisa missaat akissarsiassanut tuttussatut missingersorneqartarput. Taakkulu uani pineqartumi kisitsinngorunik 520.mio kr-nit missaaniissapput. Taakkulu massakkut Kommuneqarfik Sermersooq-mit maannakkut atuuttumik aningaasarsianit akileraarutigineqartartunik 42%-iusumit akileraarutigineqarpata, ataatsimut 218 mio.kr-nit akissarsianit iluanaarutaasussatut missingersuutigineqarsinnaapput. Taakkunanngalu kommune 135 mio.kr-nik (26%-usunit) iluanaaruteqassaaq, Selvstyre 52 mio.kr (10%-usunit) iluanaaruteqartoq ,) Kommunit ataatsimut akileraartarfianut 31 mio.kr-nit (6%)-inik iluanaaruteqassallutik.

Siunnersuut attatiinnassappat ilanngaateqanngitsumik akileraarut 35%-iusoq Selvstyre.mut 182 mio.kr tungaannut iluanaarutaasussaavoq.

Namminermini siunnersuut oqariartuuteqarpoq,siunnersuutip namminermini ersersimmagu sulisut avataaneersut tamatumani sunniuteqarnissaat, siunnersuummi naleqqiussami uani pineqartumi. Taamaakkaluartoq siunnersuummi tamanna erseqqarissarneqaranilu arlaatigut takussutissiorneqanngilaq, nunaqavissut avataaneersulluunnit sulisorineqarnissaasa immikkoortitaarneri pillugit, taamaammat tamanna siunnersuut malillugu aningaasatigut qanoq Kommune-mut Selvstyremullu sunniuteqarnissaa naatsersoruminaappoq.

Kommuneqarfik Sermersooq-p taamaattoq siunnersuut tutsuiginanngitsutut isigaa, mittarfiliornissami aallartisarnermi sanaartornermi suliniummi namminermini illoqarfimmut attuumassuteqarpallaarnera pissutigalugu, soorlu talittarfiliornerit, nuna tamakkerlugu suliffeqarfiliornerit, tamakkulu assigisaat soorlu nuna tamakkerlugu napparsimmaveqarfiliornerit, ilimmarfik , il.il. Kommuneqarfik Sermersooq-llu tamanna siunnersuutip akileraarnikkut immikkoortiterinerni naleqquttumik , allaanerusumilluunnit inissisimaneramik uppernarsaatissaqanngitsutut nalilerpaa. Taamalilluni siunnersuut periarfissanik

isummersuutaasinnaasunik matussusiivoq, siunnersuutit arlaat , sunaluunnit Namminesortut suliakkiissutaat akileraarnikkut ”immikkuullarissumik” suliarineqarnissaat ilimanaateqalerluni.

Siunnersuummi aporfiit annersaasa ilagaat, nunaqavissunik, nalinginnaasumik nunatsinnut akileraartussanut, isumaqatigiissutit malillugit akissarsiaqartunut sulisitsinissaq iluaqutitaqangitsutut siunnersuummi ersimmat. Taamaalilluni Nuummi mittarfiliornissaq qaffasissumik ineriartortumik inissisimanissani annaassammaqu.

Kommuneqarfik Sermersooq taamaasilluni sukkulluunnit allatut periuseqarnissaq piumaneruaa, nunatta avataaneersut, nammineq nunaqavissunit sulisinnaasunik ajunnginnerusumik periarfissinneqannginnissaat eqqarsaatigalugu. Sulisunut tamanut atugassarititaasut assigiimmik oqumaaqatigiinnissaat Kommuneqarfik Sermersuup sanaartornermi iluanaarutaasussanik pingaartinneruaa

Taamaammat Kommuneqarfik Sermersooq ima tullerriaartumik siunnersuutissaqarpoq. Siunnersuut§ 1, siulleq 1, nr.3 aamma 4, peerneqassasut. Tamatumalu saniatigut nalinginnaasumik allat illoqarfiit sanaartorfigineqartarnerisut , inuunnaat akileraarutaat nalinginnaasumik piumaffigineqartassasut. Nikinganerujussuaq sulisitsisuni atorunnaassagaluarpoq aammalu naligiimmik kikkunnut tamanut atugassarititat assigiilerlutik.

Saniatigut Kommuneqarfik Sermersooq aammaarluni isumaqatiginninniarneq neqeroorutigeqqikkusuppa , mittarfiliorniarnerni ataatsimut piginneqatigiinnissaq aammalu siunnersuutit § 1, siulleq 1, nr.3 aamma 4, atorunnaarsinnissaat.

Siunnersuutip ilaani oqaaseqaatit imatut allaqqapput , ”maani nunatsiniitsilluni avataaniit sulisoqassappat , sulisitsineq aalajangersimasumik killilimmik inissisimatillugu , amerlanertigut tapiissutit soorlu meeqqerivinni, atuarfinnullu tapiissutaasassapput. Taamatullu inissisimasoqartillugu, pisortat tapiissutaat atorneqarnerani, amerlanertigut peqqinnissaqarfiup iluani atuinerit nunatta karsianit aningaasaliiffigineqartassapput” aamma nangeqqippoq ”tamanna aqqutigalugu eqqumaffigisariaqarpoq mittarfiit illoqarfinnut attuumassuteqartunut, pisortanit aningaasartuutit kommuninit atortussaatinneqartut , ilimagineqassammata mittarfeqarfiornermi anginerunissaat, soorlu aatsitassarsiornermi illoqarfinniit avanngasissumi inissisimasuninngarnit. ”

Tamanna takussutissaavoq, siunnersuut - ajunngitsumik siunertaqaraluarluni - DUT –princip (Namminersortut kommuninut illersuisussaanagerat)-nut unioqutitsinerussammat, soorlu Aningaasaqarnermut inatsimmi 2017-meersumit allaqqasoq , nalinginnaasumik nalunaarsuiffiit (qupperneq 97 qallunaatuumi), Kommunit suleqatigalugit missingersuusiornerni isumaqatigiissutit ataani allaqqammat ”illuatungeriit missingersuutini isumaqatigiissummi , missingersuutit pillugit isumaqatigiissummut illuatungeriit tamakkiisumik oqimaaqatigiittoqarnissaanut tunngaviup atorinissaa (DUT-princip) suliniutini Kommuninut kinguneqartinneqarsinnaasuni isumaqatigiissut atuutsinneqarnissaa.

Dut-princip naligiissarnissamut periusiuvoq, naalagaaffimmit tapiissutit ataqatigiinnissaanut isumarnaarsisoq, Selvstyre malittarisassanik allannguigaangata kommunit aningaasaqarneranut attuisussamik. Tamassuma imarissavaa naalagaaffiup tapiissutaasa nalimmassarnissaai, aningaasartuutit kommunini kingunerinut. Periuseq taanna illuatungeriinnut tamanut atuuppoq, kommunit aningaasartuuteqartiinneqarpata imaluunnit aningaasartuutiniq suliamut oqilisaasoqartillugu.’

.Tamatumunnga tunngatillugu , siunnersuutit § 1, siulleq 1, nr.3 aamma 4, kommunep akileraarutitut iluanaarutissaai 135 mio.kr-nit tungaanut amerlassusilinnik arsaarneqassaaq, saniatigut mittarfiliortut pisortat aningaasartuutaanik ilanngaanissaanik aamma ilimageriissavaa kommunep pisortatut akeqanngitsumik kiffartuussineranik, tamannalu (Dut-princip)-pimut unioqqutitsinerussalluni, Selstyrep eqqumaffigalugulu akisussaaffigisariaqagaanik.

Tamaasilluni Kommuneqarfik Sermersooq naggataagut Selvstyre piumasaqarfigaa mittarfiliornerit nalinginnaasumik inuinnaat akileraartarneranik inatsit atuutsinneqassasoq, sulisut mittarfiliornermi tamarmik nunaqavissuugunik avataaneersuugunilluunnit assigiimmik pineqaqqullugit.

Kommuneqarfik Sermersooq neqeroorutini ammaqqippaa mittarfiliortitsinermi piginneqataasutut inissisimanissani.

Inuss. inuull. · Med venlig hilsen · Kind regards

Troels Tolstrup Pedersen
Økonomichef

Handwritten signature in blue ink, appearing to read "Troels Tolstrup Pedersen".